

Na osnovu člana 24c. Uredbe o dopuni Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 32/10, a u vezi sa članom 91. stav 1. Poslovnika o radu Vlade Federacije Bosne i Hercegovine-Prečišćeni tekst („Službene novine Federacije BiH“, br. 6/10 i 37/10), Ured Vlade Federacije Bosne i Hercegovine za zakonodavstvo i usklađenost sa propisima Evropske unije utvrdio je Prečišćeni tekst Uredbe o metodologiji za pripremu programa i izradu početnog bilansa preduzeća za privatizaciju, kako slijedi:

UREDBA

O METODOLOGIJI ZA PRIPREMU PROGRAMA I IZRADU POČETNOG BILANSA PREDUZEĆA ZA PRIVATIZACIJU

(Prečišćeni tekst)

I. OSNOVNE ODREDBE

Član 1.

Ovom uredbom uređuje se postupak pripreme, sadržaj programa privatizacije preduzeća (u daljem tekstu: program), postupak izrade početnog bilansa i postupak odobravanja programa i početnog bilansa u skladu sa Zakonom o privatizaciji preduzeća (u daljem tekstu: Zakon).

Član 2.

Preduzeća iz člana 1. zakona, osim preduzeća iz člana 26. stav 1. tačka a) Zakona, dužna su pripremiti program, u skladu sa Zakonom i ovom uredbom.

Kada je privatizacija uvjetovana podjelom preduzeća na više samostalnih tehnoekonomskih cjelina, preduzeće na osnovu usvojenog plana podjele, priprema programe privatizacije i početne bilanse stanja tehnoekonomskih cjelina i dostavlja nadležnoj agenciji za privatizaciju (u daljem tekstu: agencija) na usvajanje.

Član 3.

Preduzeće dostavlja program kantonalnoj agenciji za privatizaciju na čijem području je sjedište preduzeća (u daljem tekstu: kantonalna agencija), osim ako je ovom uredbom, u skladu sa zakonom, utvrđeno drugačije.

Preduzeće iz člana 3. Zakona dostavlja program agenciji za privatizaciju utvrđenoj odlukom Vlade Federacije BiH. Preduzeće iz člana 6. alineja 1. Zakona o agenciji za privatizaciju („Službene novine Federacije BiH“, br. 18/96 i 2/02) program dostavlja Agenciji za privatizaciju u Federaciji BiH (u daljem tekstu: Agencija).

II. PRIPREMA PROGRAMA

Član 4.

Preduzeće priprema program na osnovu aktivnog podbilansa stanja utvrđenog u okviru početnog bilansa stanja, u skladu sa posebnim zakonom i metodologijom.

Preduzeće je dužno u programu iskazati vrijednost većinskog ili isključivog vlasničkog uloga koji ima u drugom preduzeću, na osnovu prethodno sačinjenog početnog bilansa stanja tog preduzeća.

Član 5.

Ukoliko u aktivnom podbilansu stanja preduzeća u ukupnom kapitalu sa 50% ili više učestvuje kapital čiji vlasnik nije fizičko ili pravno lice (u daljem tekstu: državni/društveni kapital), preduzeće priprema program putem prodaje imovine i/ili dionica, odnosno udjela preduzeća.

Ukoliko u aktivnom podbilansu stanja preduzeća u ukupnom kapitalu državni/društveni kapital učestvuje sa manje od 50%, o prodaji dionica po osnovu državnog/društvenog kapitala odlučuje agencija.

Preduzeće iz stava 2. ovog člana dužno je agenciji dostaviti početni bilans stanja sa informacijama i ispravama iz člana 18. tač.1,2,5,11. i 13. ove uredbe, kao i privremena pravila dioničkog društva iz člana 10. stav 5. ove uredbe, najkasnije u roku iz člana 7. stav 1. Zakona.

Član 6.

Preduzeće koje se nalazi u postupku privatizacije u cilju pribavljanja dodatnog kapitala može izvršiti povećanje osnovnog kapitala u stvarima, pravima i novcu, kao i provesti postupak konverzije duga u kapital u cilju smanjenja obaveza preduzeća.

Radnje iz stava 1. ovog člana se provode na osnovu odluke agencije uz prethodno pribavljeno mišljenje resornog ministarstva i saglasnost nadležne vlade.

Agencija će propisati način provođenja aktivnosti iz st.1. i 2. ovog člana u roku od 30 dana od dana stupanja na snagu Uredbe o izmjenama i dopunama Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“ broj 73/06).

Član 7.

Ukoliko preduzeće iz člana 4. stav 2. ove uredbe u programu predviđa prodaju vlasničkog uloga u drugom preduzeću, dužno je u programu predložiti način prodaje tog uloga.

III. SADRŽAJ PROGRAMA

Član 8.

Program obavezno sadrži:

- 1) osnovne informacije o preduzeću;
- 2) informacije o pravnom statusu preduzeća;
- 3) podatke o strukturi kapitala preduzeća;
- 4) dokumentaciju o vlasništvu na nekretninama;
- 5) informacije o vlasničkom učešću u drugim preduzećima;
- 6) osnovne podatke o finansijskom poslovanju;
- 7) podatke o broju i strukturi zaposlenih;
- 8) ispunjavanju obaveza iz zaštite okoliša;
- 9) prijedlog metoda privatizacije;
- 10) način prodaje i način plaćanja;
- 11) privremena prava dioničkog društva i
- 12) prezime i ime lica odgovornog za dodatne informacije.

Član 9.

Osnovne informacije o preduzeću obavezno uključuju: naziv preduzeća, sjedište preduzeća, broj jedinstvenog matičnog registra preduzeća, šifru djelatnosti preduzeća prema Standardnoj klasifikaciji djelatnosti, i opis pretežne djelatnosti preduzeća.

Član 10.

Informacije o pravnom statusu preduzeća obavezno uključuju podatke o obliku organizovanja i upisa u sudski registar preduzeća.

Ukoliko u vrijeme pripreme programa preduzeće nije organizovano u obliku dioničkog društva, odnosno društva s ograničenom odgovornošću, dužno je donijeti odluku o organizovanju u jedan od navedenih oblika.

Odredbe čl.14. i 49. Zakona o preduzećima („Službene novine Federacije BiH“, br. 2/95 i 8/96), o najmanjem broju osnivača dioničkog društva, odnosno društva s ograničenom odgovornošću ne primjenjuje se na odluku o transformaciji iz stava 2. ovog člana.

Promjena oblika organizovanja na osnovu odluke iz stava 2. ovog člana upisuje se u sudski registar poslije okončanja postupka privatizacije, na osnovu rješenja iz člana 38. Zakona.

Preduzeće koje je organizovano u obliku dioničkog društva, odnosno koje o tome donosi odluku u smislu stava 2. ovog člana, u okviru pripreme programa dužno je donijeti privremena pravila dioničkog društva, kojim se uređuju prava dioničara, način odlučivanja na skupštini dioničara neposredno ili po ovlaštenju, i zaštita prava dioničara sa manjinskim učešćem u vlasništvu.

Obavezne elemente privremenih pravila iz stava 5. ovog člana utvrđuje Agencija.

Član 11.

Informacije o strukturi kapitala uključuju:

- 1) ukupan iznos kapitala, odnosno osnovne glavnice preduzeća;
- 2) broj i nominalnu vrijednost postojećih dionica, odnosno udjela;

- 3) spisak postojećih dioničara, odnosno, vlasnika udjela i pojedinačno učešće u osnovnoj glavnici;
- 4) iznos državnog/društvenog kapitala i njegovo učešće u ukupnom kapitalu.

Podaci iz stava 1. tač. 2. i 3. ovog člana utvrđuju se na osnovu rezultata revizije izvršene po Uredbi o reviziji prethodno izvršene vlasničke transformacije („Službene novine Federacije BiH“, br. 1/98 i 16/99).

Za dionice po osnovu državnog/društvenog kapitala preduzeća iz člana 26. Zakona i vlasničkih uloga preduzeća iz člana 1. Zakona u drugom preduzeću, koje se prodaju u postupku male privatizacije u smislu odredaba čl. 26. do 28. Zakona, preduzeće je dužno utvrditi nominalnu vrijednost u konvertibilnim markama (u daljem tekstu: KM), zaokruženu na stotine, s tim da ne može biti veća od 1000 KM.

Za dionice po osnovu državnog/društvenog kapitala preduzeća iz člana 1. Zakona, koje se prodaju putem javne ponude dionica, broj i nominalna vrijednost utvrđuje se po okončanju postupka prodaje.

Član 12.

Preduzeće je dužno u programu navesti podatke o: vlasništvu na nekretninama, prava zakupa trećih lica na nekretninama u vlasništvu preduzeća, pravu zakupa u korist preduzeća na tuđim nekretninama, te broju i ukupnoj površini stanova u vlasništvu preduzeća.

Član 13.

Preduzeće je dužno u programu navesti podatke o ulozima u dugim preduzećima u zemlji i/ili inostranstvu, osnovanim samostalno ili sa drugim domaćim i/ili stranim partnerima, nezavisno od obima učešća u vlasništvu.

Član 14.

Program sadrži slijedeće informacije o finansijskom poslovanju:

- 1) ukupan prihod, ukupan rashod, dobit ili gubitak u posljednje dvije godine;
- 2) obaveze po kreditima, sa iznosima i rokom otplate uključujući neplaćene otplate i kamate,i
- 3) vrijednost investicija u toku.

U slučaju da programom predlaže prodaju stalnih sredstava čija vrijednost učestvuje sa više od 60% u ukupnoj vrijednosti imovine u početnom bilansu stanja, preduzeće je dužno u program uključiti i specifikaciju obaveza prema povjericima.

Član 15.

Program sadrži podatke o ukupnom broju zaposlenih u preduzeću, njihovoj strukturi po kvalifikacijama i stažu osiguranja, broju radno angažovanih i broju radnika koji nisu raspoređeni i radno angažovani (u statusu „čekanja“).

Član 16.

Preduzeće u programu predlaže metod privatizacije, u skladu sa redosljedom metoda privatizacije utvrđenim odredbama čl.11 i 19. Zakona.

Član 17.

Način plaćanja prilikom prodaje imovine i/ili dionica, odnosno udjela u postupku male privatizacije i javne ponude dionica preduzeća u programu utvrđuje se u skladu sa odredbama člana 28. Zakona i pravilima prodaje iz člana 37. Zakona.

Član 18.

Uz program, preduzeće obavezno sačinjava i agenciji dostavlja dokumentacionu osnovu, koju čine:

- 1) rješenje o upisu u sudski registar svih promjena od 1989. godine;
- 2) posljednje obavještenje o razvrstavanju preduzeća u jedinstvenom matičnom registru;
- 3) rješenje o upisu u sudski registar i odluke, odnosno ugovori o osnivanju preduzeća u zemlji i inostranstvu, osnovanih samostalno ili sa drugim domaćim ili stranim licima, nezavisno od obima učešća u vlasništvu;
- 4) odluka o promjeni oblika organizovanja i privremena pravila dioničkog društva iz člana 10. ove uredbe;
- 5) rješenje o reviziji transformacije vlasništva izvršene otkupom internih dionica;
- 6) spisak dioničara, odnosno vlasnika udjela, sa pojedinačnim učešćem u kapitalu preduzeća;
- 7) izvodi iz zemljišnih knjiga za nekretnine u vlasništvu preduzeća;
- 8) izvodi iz zemljišnih knjiga, odnosno rješenja o hipotekama, upisanim na nekretnine u vlasništvu preduzeća, sa podacima i ispravama o osnovi i visini duga obezbijedenog hipotekom;
- 9) izvodi iz zemljišnih knjiga, odnosno rješenja o hipotekama upisanim u korist preduzeća na tuđe nekretnine, sa podacima i ispravama o osnovu i visini potraživanja obezbijedenog hipotekom;
- 10) ugovori o zakupu nekretnina i opreme koje je preduzeće zaključilo kao zakupodavac ili zajmoprimaoc;
- 11) evidencija stanova u vlasništvu preduzeća;
- 12) pregled strukture zaposlenih po kvalifikacijama i stažu osiguranja;
- 13) bilans stanja i bilans uspjeha za posljednje dvije godine;
- 14) ugovori o kreditima sa anuitetskim planom otplate i garancije banaka.

IV. IZRADA POČETNOG BILANSA

Član 19.

Preduzeće priprema početni bilans stanja u skladu sa odredbama Zakona o početnom bilansu stanja preduzeća i banaka („Službene novine Federacije BiH“, br. 12/98, 40/99, 47/06, 38/08 i 65/09) i odredbama ove uredbe, osim općina koje privatiziraju poslovne prostore na osnovu člana 29. Zakona.

Član 20.

Dokumentacionu osnovu za izradu početnog bilansa preduzeća čine knjigovodstveni dokumenti u skladu sa Zakonom o računovodstvu („Službene novine Federacije BiH“, br. 2/95 i 12/98).

Agencija ima pravo uvida u knjigovodstvenu dokumentaciju iz stava 1. ovog člana.

U početnom bilansu iskazuju se rezultati prethodno izvršene vlasničke transformacije, u skladu sa Uredbom o reviziji prethodno izvršene vlasničke transformacije.

Član 21.

Preduzeće je dužno za iznos nenominiranog kapitala uvećati a za iznos neraspoređenog gubitka umanjiti ostale oblike kapitala, srazmjerno njihovom učešću u ukupnom kapitalu.

Član 22.

Preduzeće je dužno vrijednost obaveza prema bankama po osnovu inostranih kredita dobijenih prije 31.3.1992. godine isknjižiti iz bilansa i za taj iznos uvećati državni/društveni kapital.

Član 23.

Preduzeće je dužno procijeniti vrijednost zemljišta iz člana 3. stav 4. Zakona o početnom bilansu preduzeća i banaka, u skladu sa odredbama Računovodstvenog standarda 1-Stalna sredstva u obliku stvari („Službene novine Federacije BiH“, broj 2/95), i za iznos povećanja vrijednosti uvećati državni/društveni kapital.

Upis promjene prava vlasništva na nekretninama sa izgrađenim građevinskim zemljištem, u smislu stava 1. ovog člana, ne smatra se prometom nekretnina.

Član 24.

Općina je dužna procijeniti vrijednost poslovnih prostora iz člana 29. Zakona u skladu sa odredbama Računovodstvenog standarda 1-Stalna sredstva u obliku stvari, a što predstavlja polaznu osnovu za utvrđivanje početne cijene za privatizaciju.

Član 25.

Preduzeće je dužno iz početnog bilansa isknjižiti vrijednost obaveza po kreditima domaćih banaka sa stepenom naplativosti manjom od 50% i za taj iznos uvećati državni/društveni kapital.

Radnje iz stava 1. ovog člana preduzeće provodi na osnovu pismene obavijesti banke.

Član 26.

Preduzeće je dužno isknjižiti dionički kapital u bankama u Federaciji Bosne i Hercegovine (u daljem tekstu: Federacija) i za taj iznos umanjiti državni/društveni kapital.

Član 27.

Preduzeće je dužno utvrditi saldo potraživanja od Federacije po osnovu isporuka gotovih proizvoda, repromaterijala i opreme i obaveza preduzeća prema Federaciji po osnovu neplaćenih carina, poreza, doprinosa i finansijskih pozajmica.

Dugovni saldo iz stava 1. ovog člana preduzeće će isknjižiti i za taj iznos umanjiti državni/društveni kapital

Potražni saldo iz stava 1. ovog člana preduzeće će isknjižiti i za taj iznos uvećati državni/društveni kapital.

Član 28.

Preduzeće je dužno utvrditi saldo potraživanja i obaveza nastalih do 31.3.1992. godine u odnosima sa pravnim i fizičkim licima sa područja drugih republika bivše SFRJ i Republike Srpske.

Dugovni saldo iz stava 1. ovog člana preduzeće će isknjižiti i za taj iznos umanjiti iznos kapitala, srazmjerno učešću pojedinih oblika kapitala u ukupnom kapitalu.

Potražni saldo iz stava 1. ovog člana preduzeće će isknjižiti i za taj iznos uvećati iznos kapitala, srazmjerno učešću pojedinih oblika kapitala u ukupnom kapitalu.

Član 29.

Preduzeće je dužno iz poslovnih knjiga isknjižiti stvari koje nisu u posjedu, odnosno pod kontrolom preduzeća i za taj iznos umanjiti iznos kapitala, srazmjerno učešću pojedinih oblika kapitala u ukupnom kapitalu.

Ako kapital preduzeća nije dovoljan za isknjižavanje stvari iz stava 1. ovog člana, isknjižavanje se vrši na teret obaveza preduzeća, prema sljedećem redoslijedu:

- dugoročne obaveze prema preduzećima u isključivom državnom /društvenom vlasništvu;
- dugoročne obaveze prema bankama iz člana 3. stav 1. Zakona o privatizaciji banaka („Službene novine Federacije BiH“, br. 12/98, 29/00, 37/01 i 33/02), osim obaveza po osnovu kredita dobijenih od međunarodnih institucija posredstvom domaćih banaka;
- ostale dugoročne obaveze.

Član 30.

Preduzeće je dužno iz poslovnih knjiga isknjižiti iznos ratne štete na stalnim i obrtnim sredstvima i za taj iznos umanjiti iznos kapitala, srazmjerno učešću pojedinih oblika kapitala u ukupnom kapitalu.

Ako kapital preduzeća nije dovoljan za isknjižavanje stvari iz stava 1. ovog člana, isknjižavanje se vrši na teret obaveza preduzeća, prema sljedećem redoslijedu:

- dugoročne obaveze prema preduzećima u isključivom državnom/društvenom vlasništvu;
- dugoročne obaveze prema bankama iz člana 3. stava 1. Zakona o privatizaciji banaka osim obaveza po osnovu kredita dobijenih od međunarodnih institucija posredstvom domaćih banaka;
- ostale dugoročne obaveze.

Član 31.

Preduzeće je dužno iz poslovnih knjiga isknjižiti knjigovodstvenu vrijednost stanova na kojima postoji stanarsko pravo, na teret državnog/društvenog kapitala.

Član 32.

Ako je prema ranijim propisima preduzeće izvršilo isknjižavanje stavki iz pasivnog i neutralnog podbilansa i evidentiralo ih u vanbilansnu evidenciju, isknjižavanje se vrši iz vanbilansne evidencije.

Član 33.

Preduzeće je dužno dostaviti korigovani Aktivni podbilans ako je vršilo prodaju stvari i prava sadržanih u Pasivnom podbilansu.

Iznos dobijen od prodaje iz stava 1. ovog člana preduzeće knjiži obrnuto od isknjižavanja.

Član 34.

Ukoliko se do prihvaćanja početnog bilansa od strane agencije, ne naplate iskazana potraživanja u Aktivnom podbilansu kojima je rok naplate istekao, iskazuju se kao sumnjiva ili sporna potraživanja u skladu sa računovodstvenim standardom 5-Kratkoročna potraživanja i razgraničenja.

Po odobravanju programa preduzeće isknjižava sumnjiva ili sporna potraživanja.

Član 35.

Lica koja nisu izmirila obaveze iz člana 34. ove uredbe ne mogu učestvovati u kupovini imovine, udjela ili dionica preduzeća koja se privatiziraju na teritoriji Federacije sve do potpunog izmirenja svojih obaveza.

Član 36.

Novčana sredstva, naplaćena po osnovu sumnjivih ili spornih potraživanja iz člana 34. ove uredbe, do početka realizacije programa pripadaju preduzeću.

Novčana sredstva, naplaćena po osnovu sumnjivih ili spornih potraživanja iz člana 34. ove uredbe, poslije početka realizacije programa pripadaju agenciji.

Član 37.

Preduzeće je dužno agenciji dostaviti korigovani Aktivni podbilans ako je vršilo prodaju u skladu sa članom 26. stav 1. tač. b) i c) Zakona.

Član 38.

Izuzetno od odredaba tačke 1.8. računovodstvenog standarda 1-Stalna sredstva u obliku stvari, prihodi manji od neotpisane vrijednosti stalnog sredstva prodatog u postupku privatizacije, u skladu sa članom 26. stav 1. tač. b) i c) i članom 28. Zakona, ne terete neposredne rashode.

Za razliku prihoda i knjigovodstvene vrijednosti stalnog sredstva iz stava 1. ovog člana umanjuje se državni/društveni kapital.

V. ODOBRAVANJE PROGRAMA I POČETNOG BILANSA

Član 39.

Ukoliko je program pripremljen u skladu sa Zakonom i ovom uredbom, agencija donosi rješenje o odobravanju programa i dostavlja ga preduzeću:

Rješenjem iz stava 1. ovog člana agencija naročito utvrđuje:

1. iznos državnog/društvenog kapitala koji se privatizira;

2. način prodaje državnog/društvenog kapitala, u skladu sa pravilima iz člana 37. zakona;
3. način plaćanja.

Rješenjem iz stava 1. ovog člana, agencija može utvrditi način prodaje i način plaćanja drugačije od predloženog u programu, pri čemu je dužna navesti razloge za takvu odluku.

Član 40.

Ukoliko program ne sadrži sve elemente iz čl. 9. do 17. ove uredbe, ili isprave iz člana 18. ove uredbe, agencija će rješenjem naložiti preduzeću ispravku ili dopunu programa.

Preduzeće je dužno dostaviti agenciji program dopunjem u skladu sa rješenjem iz stava 1. ovog člana, u roku od 15 dana od dana prijema rješenja.

Ukoliko preduzeće ne dostavi agenciji program dopunjen u skladu sa stavom 2. ovog člana, agencija će donijeti rješenje o odbijanju programa i o tome izvijestiti nadležno ministarstvo.

Agencija neće donijeti rješenje o odbijanju programa, ako preduzeće nije u mogućnosti dostaviti dokumentacionu osnovu iz člana 18. tačka 7) ove uredbe, s tim da se postupak dokazivanja vlasništva mora završiti do okončanja privatizacije preduzeća, odnosno do izdavanja rješenja o izvršenoj privatizaciji iz člana 38. Zakona, kod preduzeća koja se prodaju pitem Javne ponude dionica.

Član 41.

Ukoliko ocijeni da predloženi program ne obezbjeđuje postizanje najpovoljnijih ukupnih efekata privatizacije preduzeća, agencija će odbiti program rješenjem, u kome je dužna navesti razloge odbijanja i o tome izvijestiti nadležno ministarstvo.

U slučaju iz člana 20. stav 3. i stava 1. ovog člana, agencija je dužna donijeti odluku o načinu privatizacije preduzeća, u skladu s članom 10. Zakona.

Član 42.

Ukoliko početni bilans preduzeća ne sadrži elemente utvrđene zakonom i ovom uredbom, agencija će pismeno obavijestiti preduzeće o nedostacima i potrebnim ispravkama i dopunama, u roku od 15 dana od dana predaje početnog bilansa.

Preduzeće je dužno u roku od 15 dana od dana prijema obavještenja iz stava 1. ovog člana dostaviti agenciji ispravke i dopune početnog bilansa.

Član 43.

U slučaju kada agencija utvrdi da početni bilans preduzeća nije izrađen na osnovu odgovarajućih knjigovodstvenih dokumenata u skladu sa zakonom i ovom uredbom, donijeće rješenje o odbijanju početnog bilansa u roku od 60 dana od dana predaje početnog bilansa.

Preduzeće je dužno u roku od 15 dana od dana prijema rješenja iz stava 1. ovog člana dostaviti agenciji novi početni bilans stanja.

VI. KAZNENE ODREDBE

Član 44.

Novčanom kaznom u iznosu od 1.000 do 10.000 KM kazniće se za privredni prijestup preduzeće ako:

- 1) agenciji ne dostavi program u roku iz člana 7. Zakona;
- 2) ne postupi po rješenju agencije iz člana 21. stav 2. ove uredbe.

Za privredni prijestup iz stava 1. ovog člana kaznit će se i odgovorno lice u preduzeću novčanom kaznom u iznosu od 500 do 2.000 KM.

Član 45.

Do puštanja u opticaj konvertibilne marke (KM), novčane kazne propisane ovom uredbom mogu se plaćati u DEM ili protuvrijednosti valuta koje se koriste u platnom prometu Federacije, po srednjem kursu koji utvrđuju i objavljuju nadležne finansijske institucije, na dan plaćanja.

VII. PRIJELAZNE I ZAVRŠNE ODREDBE

Član 46.

Agencija za privatizaciju u Federaciji BiH će donijeti uputstvo kojim će utvrditi obavezne elemente privremenih pravila iz člana 10. stav 6, ove uredbe u roku od 30 dana od dana stupanja na snagu Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 10/98).

Član 47.

Preduzeće iz člana 3. stav 1. Zakona o početnom bilansu stanja preduzeća i banaka izrađuje konačni početni bilans u roku od 30 dana nakon provedenog postupka revizije u skladu sa Uredbom o načinu raspolaganja spornom imovinom kada dva ili više preduzeća u svojim početnim bilansima iskazuju ista prava, iste stvari, iste obaveze i isti kapital i o načinu i postupku revizije tih preduzeća.

Član 48.

Ovlašćuje se Agencija za privatizaciju u Federaciji BiH da propiše oblik i sadržaj obrazaca za iskazivanje podataka iz početnog bilansa u roku od sedam dana od dana donošenja Uredbe o izmjenama i dopunama Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 26/98)

Član 49.

Prečišćeni tekst Uredbe o metodologiji za pripremu programa i izradu početnog bilansa preduzeća za privatizaciju obuhvata: Uredbu o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 10/98), Uredbu o izmjenama i dopunama Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 26/98, Uredbu o dopuni Urede o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 49/99), Uredbu o dopuni Urede o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 40/00), Uredbu o izmjenama i dopunama Uredbe o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 73/06), i Uredbu o dopuni Uredbe o metodologiji za

pripremu programa i izradu početnog bilansa preduzeća za privatizaciju („Službene novine Federacije BiH“, broj 32/10), u kojima je naznačen dan stupanja na snagu tih uredbi.